

Paul di bura remanu Thessalonica vene rofu

Ago di ini adina

Amiye be yaku Keriso dairi dena di mokena ekalesia vene rofu Thessalonica taoniri moi no regamadi. *Paul di ouresi bura Thessalonica vene rofu* ri bi mokena Varika Amiye bi sena deyo vo niyadi dada bura reyo. Ina yaku mina mokena moi rorobo resi ina vene rofu niyo ma Keriso dairi dego ma vegu no di sina moi tora iniye vo nigedi “Amiye No Iniye” (2.3) di ini ourefeidenaga gabireri baebu. Mina amiye no iniye yaku Keriso rofu uka gira dudu moi no regika.

Oteimana amiye yaku ekalesia vene rofu niyo ma ina vene bi esika esika ma kerere ogau nibigo idu, ini uka vari gira aibobigedi. Ina vene yaku moimai regedi ri ameibigedi Paul ma ini moimai yokoi vene kana, toga toga vegu buni regika.

Beika sina ideri

Ago di ini adina 1.1-2

Keriso dairi dego ri bi Sei yaku amiye kota aigo 1.3-12

Keriso dairi dena di ago 2.1-17

Sei di mokena vari gira aina vene di vegu 3.1-15

Metona ago 3.16-18

1 ¹ Mina bi Paul, Silas, ma Timothy yaku bura reyafa —^a
Ekalesia vene rofu Thessalonica ri, kaere bi uni Baba Sei di ma Varika Amiye Iesu Keriso di:

² Baba Sei ma Varika Amiye Iesu Keriso di buni tora gade ma uka amuta bi ya vene sa.

Keriso dairi dego ri Sei yaku amiye rofu kota rego

³ Usika ourena, una yaku toga toga ya vene dada Sei rofu buni tora gade maragadu. Makai resifa bi buni, ini adina bi ya vene di mokena vari gira aiyadi ina rofu bi, tora nido ya kaya ya kaya rofu uka madedi yaku

^a 1.1 Acts 17.1

bi tora nido. ⁴Mina dada una yaku Sei di ekalesia vene di nemokori ka ya rofu ni vasina resifa. Ya ni vasina resifa sana bi yomakai: esika tora ma toe tora moisi amededi idu, are rei gira resi bi yi mokena vari gira Sei rofu aisi amededi.

⁵Mina vegu rededi yaku nido Sei di kota rena bi mokena rorobo resi makai esika moi amededi dada ini ourefeidenana amena sana ideri amegedi. ⁶Sei yaku vegu rama rego dada: Esika ya madedi vene rofu bi ina yaku esika mago. ⁷Resi bi Sei yaku ya rofu, kaere bi gua esika moisa bi, ini vegu buni masi una rofu ka makai rego. Varika Amiye Iesu ini naivo naivo vima tau ma ita fairo sa oma gutuna ogau nigedi di meda bi makai vata nigo. ⁸Sei rofu gedu madedi vene rofu, ma uni Varika Amiye Iesu di ago buni de neidededi vene rofu ini obini toe tora iniye mago. ⁹Ini obini bi yomakai: ina vene bi toga toga ameibona di esika kaunava mina mago ma Varika Amiye ma ini vava di vabara gutuna resi ini nemokori nuga feidego.^b ¹⁰Ini mina dego medari, ini vene tau yaku ini vabara magedi ma ini mokena vari gira aiyadi vene yaku ini roka ni odoro regedi. Mina ya vene ka ina vene fogori are regedi adina ya niyafa ago bi yi mokena vari gira aiyadi.

¹¹Mina dada toga toga ya vene rofu usa usa nisifa. Uni Sei usa nisifa, ina yaku ya vene di vegu moi buni reyainedi vegu buni ya raka niyo amegedi dada. Ina yaku yi vegu buni di ura tau ma mokena vari gira aina di moimai vava dudu moi rama rigo. ¹²Makai ida dudu bi uni Varika Amiye Iesu di roka ni odoro regedi ya vene dada, resi yi roka bi ni odoro rego ina dada, uni Sei ma Varika Amiye^c Iesu Keriso di buni tora gade dudu.

Amiye no iniye

2 ¹Yomina sina bi uni Varika Amiye Iesu Keriso di dairi dego ina sa egogo regifa ri bi yomakai: Nai usika ourena vene ya usa nisifa^d ²bi yi mokena bi evade moi forovai ga refa o, uka esika ga refa, adina bi be vene yaku nidedi bi Varika Amiye di meda bi okiyo, vo nidedi. Be yaku mokededi bi vima di agori o sina sina nokoiri, o fefa yokoiri bura reyafa. ³Ofa mokena dudu yokoi yaku ya eru rena ga reyaine. Adina mina meda bi de okigo mammo amiye tau Sei rofu gedu magedi ma amiye no iniye bae ogau nigo ri, kaere bi Sei yaku muyena sanari moi feidego. ⁴Mina amiye yaku amiye di ini usa nidedi gugura tau ma deda sei rofu gedu masi iniye ni moi odoro rego mina tau rofu. Ma Sei ni vakena yavari dui resi ameinu rego ye iniye ni kake rego ina bi Sei.^e

⁵Mokededi ba ide? Mina sina tau bi ya niyaka, ya sa amegamaka ri. ⁶Ma mina nida sina de vata nido bi vegu yokoi yaku moi gira redo gua

^b 1.9 Is 2.10 ^c 1.12 *uni Sei ma Varika Amiye*; ba *uni Sei Varika Amiye*.

^d 2.1 1 Thes 4.15-17 ^e 2.4 Dan 11.36; Ezek 28.2

ga vata niyainedi, ya diba beika bodo bi. Ma ini ari ramari ogau nigo. ⁷Adina vegu no di vava sui amedo yaku ini moimai sena rei baido, idu beika bodo vegu vata nigo bi de vata nigo bogo moi gira rido amiye etae rigo mamu. ⁸Resi bi amiye no iniye kamini ogau nigo, idu Varika Amiye Iesu baisi dego ri bi ini venari gutuna asa moi feidesi umuyego ma ini baido vabara dudu moi no rigo.^f ⁹Mina amiye no iniye di baido bi Satani di moimai dudu vava tau, rebe ma ofa vegu rena.^g ¹⁰Ma ina yaku mina ofa vegu no amiye kaere muyededi rofu rego. Muyegedi adina bi sina rama di uka mana rofu vauya rededi, ye makai dudu moi vegu de rigo. ¹¹Mina dada Sei yaku ofa forovai mokena moi feidedo ye ina vene yaku ofa vegu rofu kamini mokena vari gira aigedi. ¹²Ye Sei yaku amiye tau kaere bi sina rama rofu mokena vari gira de aiyadi ma vegu no vei ada reyadi di kota aigo.

Sei ya moi vegu rena rofu raka niyo

¹³Usika ourena, toga toga ya vene rofu Sei buni tora gade manadi, ya kaere Varika Amiye yaku ya rofu uka mado. Mina dada adinari gutuna^h Sei yaku ya vene moi vegu rena rofu raka niyo, ya moi kikifa rego Vima Kikifa di vava ma sina rama rofu yi mokena vari gira aidedi dudu. ¹⁴Sei yaku uni ago buni dudu ya raka niyo, uni Varika Amiye Iesu Keriso di vabara moyaganedi. ¹⁵Mina dada, usika ourena, are rei gira resi mina ago rama ya oteimarafa moi gira refa, uni ago niyafa dudu ba ya rofu bura reyafa dudu.

¹⁶Gua uni Varika Amiye Iesu Keriso ma uni Baba Sei, kaere bi una rofu uka madedi, yaku toga toga ameibobina di mokena tora ma uka mokena buni, buni tora gade dudu una rofu maradi. ¹⁷Ina vene yaku yi uka moi gira reyagane mokena tora dudu. Ma vegu buni resi ago buni nibigedi.

Una rofu usa nifa

3 ¹Usika ourena, uni sina metonari, bi una rofu usa usa nifa kumo Varika Amiye di ago bi evade urafo rego resi vabara moyainedi, ya vene yaku ya kaya ya kaya rofu reyo kana. ²Usa ka nifa Sei yaku vegu no vene ma vegu rorobo de rededi vene gutuna una moi vegu rigo. Adina amiye tau de yaku Sei rofu mokena vari gira aidedi.

³Idu Varika Amiye toga toga ini ago ni dodu vegu redo. Adina ina yaku yeiva ya masi amiye no iniye rofu ya moi vegu rigo. ⁴Una yaku mokena vari gira Varika Amiye rofu aisifa ma mina ago gira ya rofu niyafa ya yaku reisa bi toga rebigedi.

⁵Varika Amiye yaku yi uka di mokena Sei di uka mana ma Keriso di moi yeiva resi toe moi dina veguri ourefeideyaine.

^f 2.8 Is 11.4 ^g 2.9 Mt 24.24 ^h 2.13 *adinari gutuna*; bura bedakai bi sikonufa.

Yi moimai regiya

⁶Usika ourena, uni Varika Amiye Iesu Keriso di roka dudu ya ago gira nisifa mini, uni usika ourena be kaere bi moimai de rena amededi vene ma kaere bi oteimana ago ya rofu maro bi de neidededi kaiba ga refa. ⁷Ya kaya diba uni vegu reyafa bi buni, mina kana reyainedi. Una bi duomu de ya sa amegamafa ri. ⁸Resi una yaku amiye yokoi di iruku iri tavoi de reyafa. Idu, uru ari kosika de dudu moimai regamafa, una dada ya yokoi yaku fore maku regedi baebu. ⁹Makai reyafa bi, una bi vava de ya vene rofu ya nigifa resi una aedeyaganedi bi ide, idu makai regifa ri una vesi uni vegu tari reyaganedi. ¹⁰Ya sa amegamafa ri ya rofu ago gira nigamafa, “Kaere moimai rofu vauya rego bi iruku ga iriyaine.”

¹¹Makai neidesifa amiye be yi fogori bi duomu dudu amesi moimai de rededi, idu amiye di sina agori bisu basu rei tavoi rededi. ¹²Varika Amiye Iesu Keriso di roka dudu mina vene rofu ago gira nisi sisiba masifa, vegu rorobo dudu ameibiyagane resi moimai dudu iniye ini vegu baku regedi.

¹³Ma usika ourena, ya bi vegu buni rena rofu di bi kosika ga refa. ¹⁴Amiye yokoi yaku mina ago fefari ya rofu moi feidesifa de neidego baebu, beika redo vesi ga bofa ina rofu; maena reyainedi. ¹⁵Resi tuma amiye yokoi kana dudu ga dogo refa, idu yi dubuini kana mokena dudu ago buni ni diba mafa.

Ago metonari

¹⁶Varika Amiye iniye, kaere bi uka amuta di adina yaku, uka amuta ya maraine ari neinei ida yokoi yokoi dudu. Varika Amiye bi ya vene tau sa.

¹⁷Na kaya nai vana dudu mina bura reyaka. *Na Paul yaku ya yuata nida.* Fefa tau bi makai dudu bera imida. Mina bi makai bura reida.

¹⁸Varika Amiye Iesu Keriso di buni tora gade bi ya vene tau sa ameibiyaine.